

গণপ্রজাতন্ত্রী বাংলাদেশ সরকার

জাতীয় রাজস্ব বোর্ড

ঢাকা।

[ মূল্য সংযোজন কর ]

প্রজ্ঞাপন

তারিখঃ ১৬ আষাঢ়, ১৪২১ বঙ্গাব্দ / ৩০ জুন, ২০১৪ খ্রিষ্টাব্দ।

এস. আর. ও. নং-১৬৮-আইন/২০১৪/৭১৩-মুসক।- অর্থ আইন, ২০১৪ (২০১৪ সনের ৪ নং আইন) এর ধারা ৬৭ এর উপ-ধারা (৪) এর দফা (ক) তে প্রদত্ত ক্ষমতাবলে জাতীয় রাজস্ব বোর্ড নিম্নরূপ বিধিমালা প্রণয়ন করিল, যথা:-

১। শিরোনামা ও প্রবর্তন।- এই বিধিমালা পরিবেশ সুরক্ষা সারচার্জ আদায় বিধিমালা, ২০১৪ নামে অভিহিত হইবে।

(২) ইহা ১ জুলাই, ২০১৪ তারিখে কার্যকর হইবে।

২। সংজ্ঞা।- বিষয় বা প্রসংগের পরিপন্থী কিছু না থাকিলে, এই বিধিমালায়-

(ক) "অর্থ-আইন" অর্থ অর্থ আইন, ২০১৪ (২০১৪ সনের ৪ নং আইন);

(খ) "নির্দিষ্টকৃত প্রতিষ্ঠান" অর্থ অর্থ-আইনের ধারা ৬৭ এর উপ-ধারা (৩) এর বিধান অনুযায়ী নির্দিষ্টকৃত পরিবেশ দূষণকারী প্রতিষ্ঠান;

(গ) "নির্ধারিত কোড" অর্থ পরিবেশ সুরক্ষা সারচার্জ সরকারী কোষাগারে জমা প্রদানের জন্য অর্থ মন্ত্রণালয় কর্তৃক সংশ্লিষ্ট কমিশনারেটের অনুকূলে বরাদ্দকৃত অর্থনৈতিক কোড;

(ঘ) "পরিবেশ দূষণকারী প্রতিষ্ঠান" অর্থ বায়ু, পানি বা মাটির তাপ, স্বাদ, গন্ধ, ঘনত্ব বা উহাদের অন্যান্য বৈশিষ্ট্যের পরিবর্তনসহ বায়ু, পানি বা মাটির দূষিতকরণ বা উহাদের ভৌতিক, রাসায়নিক বা জৈবিক গুণাবলীসমূহের পরিবর্তন, অথবা বায়ু, পানি, মাটি বা পরিবেশের অন্য কোন উপাদানের মধ্যে তরল, গ্যাসীয়, কঠিন, তেজস্ক্রিয় বা অন্য কোন পদার্থের নির্গমনের মাধ্যমে বায়ু, পানি, মাটি, গবাদি পশু, বন্যপ্রাণী, পাখী, মৎস্য, গাছপালা বা অন্য সবধরনের জীবনসহ জনস্বাস্থ্যের প্রতি ও গৃহকর্ম, বাণিজ্য, শিল্প, কৃষি, বিনোদন বা অন্যান্য ব্যবহারিক ক্ষেত্রে ক্ষতিকারক, অহিতকর বা ধ্বংসাত্মক কার্য সম্পাদন করে এমন প্রতিষ্ঠান;

(ঙ) "মুসক আইন" অর্থ মূল্য সংযোজন কর আইন, ১৯৯১ (১৯৯১ সনের ২২ নং আইন);

(চ) "সারচার্জ" অর্থ অর্থ-আইনের ধারা ৬৭ এর উপ-ধারা (১) এর অধীন আরোপণীয় ১ (এক) শতাংশ হারে পরিবেশ সুরক্ষা সারচার্জ।

৩। সারচার্জ আরোপ।- নির্দিষ্টকৃত প্রতিষ্ঠান কর্তৃক বাংলাদেশে উৎপাদিত সকল ধরনের পণ্যের উপর সারচার্জ আরোপযোগ্য হইবে।

৪। সারচার্জ নিরূপণ।- নির্দিষ্টকৃত প্রতিষ্ঠান কর্তৃক উৎপাদিত পণ্যের উপর মূল্যভিত্তিক ১ (এক) শতাংশ হারে সারচার্জ নিরূপিত হইবে।

৫। সারচার্জ আদায়, পরিশোধ, ইত্যাদি।- (১) অর্থ-আইনের ধারা ৬৭ এর উপ-ধারা (১) এর উদ্দেশ্য পূরণকল্পে, নির্দিষ্টকৃত প্রতিষ্ঠান, স্থানীয় উৎপাদন স্তরে,

(ক) মুসক আইনের ধারা ৫ এর উপ-ধারা (২) এর অধীন নির্ধারিত যে মূল্যের উপর তদকর্তৃক উৎপাদিত পণ্যের উপর মূল্য সংযোজন কর প্রদান করে, সেই মূল্যের উপর সারচার্জ প্রদান করিবে; এবং

(খ) মুসক আইনের ধারা ৫ এর উপ-ধারা (৭) অনুযায়ী ধার্যকৃত যে ট্যারিফ মূল্যে পণ্য সরবরাহ করে, সেই ট্যারিফ মূল্যের উপর সারচার্জ প্রদান করিবে।

(২) উৎপাদিত ও সরবরাহকৃত পণ্যের উপর প্রদেয় সারচার্জ ট্রেজারী চালানের মাধ্যমে বা, প্রয়োজ্য ক্ষেত্রে, ইলেক্ট্রনিক ট্রান্সফারের মাধ্যমে নির্ধারিত কোডে জমা করিতে হইবে।

(৩) সরবরাহকৃত পণ্যের চালানপত্রে (মুসক-১১) সারচার্জের পরিমাণ পৃথকভাবে উল্লেখ করিতে হইবে এবং প্রতি কর মেয়াদে দাখিলপত্রের সহিত সারচার্জ জমা প্রদানের ট্রেজারী চালানের মূলকপি সংযুক্ত করিতে হইবে।

৬। আদায়কৃত সারচার্জের পরিমাণ ও উহার প্রদর্শন।- কাস্টমস, এন্ড্রাইজ ও ভ্যাট কমিশনারেটসমূহ কর্তৃক উৎপাদন স্তরে আদায়কৃত সারচার্জের পরিমাণ মাসিক রাজস্ব বিবরণীতে ভিন্ন কলামে কর বহির্ভূত রাজস্ব হিসাবে প্রদর্শন করিতে হইবে।

৭। দন্ড।- (১) কোন ব্যক্তি বা প্রতিষ্ঠান বিধি ৫ এর বিধান লংঘন করিলে উহা মুসক আইনের অধীন অপরাধ বলিয়া গণ্য হইবে এবং উক্তরূপে সংঘটিত অপরাধের ক্ষেত্রে মুসক আইন ও তদধীন প্রণীত বিধিমালা অনুসারে দন্ড আরোপণীয় হইবে এবং প্রয়োজ্য ক্ষেত্রে, মুসক আইনের ধারা ৫৬ মোতাবেক ব্যবস্থা গ্রহণ করা হইবে।

(২) উপ-বিধি (১) এর অধীন কোন ব্যক্তি বা প্রতিষ্ঠানের উপর অর্ধদন্ড আরোপ করা হইলে এবং সংশ্লিষ্ট ব্যক্তি বা প্রতিষ্ঠান অর্ধদন্ড পরিশোধে ব্যর্থ হইলে সহকারী কমিশনার পদমর্যাদার নিম্নে নহেন এইরূপ কোন কর্মকর্তা তাহার পণ্যের খালাস বা সরবরাহ স্থগিত করিতে পারিবেন।

জাতীয় রাজস্ব বোর্ডের আদেশক্রমে,

(মোঃ শওকাত হোসেন)  
প্রথম সচিব (মুসক নীতি)